

四庫全書

史部

欽定四庫全書

史部

明史卷二百九十八

郎中臣丁雲錦覆勘

總校官編修臣朱鈐

欽定四庫全書

明史卷二百九十七

大學士張

廷玉等奉

敕修

列傳第一百八十五

孝義二

王俊別

楊

史五常

鄭謨

葉文榮

傅櫟

周教

石鵬

任鍾

楊成章

謝用

何競

王原

黃璽

歸鉞

族子繡

何麟

孫清

宋顯章李豫

劉憲

羅璋等

容師偃

劉靜溫鉞

俞孜

張震孫文

崔鑑

唐儼

邱緒

張鈞

張永相等

王在復

王鉞等

夏子孝

阿寄

趙重華

謝廣

王世名

李文詠

王應元等

孔金

子良

楊通照

弟通杰  
浦師等

張清雅

百精忠等

王俊城武人父為順天府知事母卒於官舍俊扶櫬還

葬刈草萊為茆舍寢處塋側野火延熱將及俊叩首慟

哭火及塋樹而止正統三年被旌劉準者唐山諸生父

喪廬墓冬月野火將及塚樹準悲號告天火遂息正統

六年旌表楊敬者歸德人父歿於陣為木主招魂以葬  
每讀書至戰陣之事輒隕涕不止母歿柩在堂鄰家失  
火烈焰甚迫敬撫柩哀號風止火滅正統十三年旌表  
石鰲渾源諸生父歿廬墓墓初成天大雨山水驟漲鰲  
仰天號哭水將及墓忽分兩道去墓獲全弘治五年旌  
表任鏜夏邑人嫡母卒廬於墓黃河衝溢將齧塋域鏜  
伏地號哭河即南徙嘉靖二十五年旌表

史五常內黃人父萱官廣東僉事卒葬南海和光寺側

五常方七歲母攜以歸比長奉母至孝常恨父不得歸  
葬母語之曰爾父杉木櫬內置大錢十爾謹志之母歿  
廬墓致毀既終喪往迎父櫬時相去已五十年寺毀於  
水久矣五常泣禱有老人以杖指示寺址發地果得父  
櫬內置錢如母言乃扶歸與母合葬復廬墓側正統六  
年旌表

周教河州衛軍家子也正統末聞英宗北狩大哭不食  
七日而死其子諸生路方諸書別墅聞父死慟哭奔歸

以頭觸庭槐亦死鄉人異之聞於州知州躬臨其喪賻麥四十斛白金一斤路妻方氏厲志守節撫子堂成立後為知縣

鄭謨石康人父賜舉人兄護進士天順中母為強賊所掠謨年十六挺身入賊壘給之曰吾欲丐吾母豈惜金第金皆母所瘞願代母歸取之賊遂拘謨而釋母然其家實無金也謨遂被殺廉州知府張岳建祠祀之榮瑄瓊州人三歲而孤與兄琇竝以孝聞天順四年土賊據



瓊城瑄兄弟扶母走避遇賊琇謂瑄曰我以死衛母汝  
急去瑄從之琇與母遂陷賊中官軍至琇被執主將將  
殺琇瑄趨至叩頭流血泣請曰兄以母故陷賊母老家  
貧恃兄為命願殺瑄存兄養母主將不察竟殺瑄後有  
葉文榮海寧人弟殺人論死母日悲泣不食文榮謂母  
曰兒年已長有子請代弟死遂詣官服殺人罪弟得釋  
而文榮坐死

傅櫟字定濟福建南安人祖凱父浚竝進士為部郎櫟

年十六舉鄉試二十成進士弘治中授行人出行襄府  
半道聞母病請入京省視再往竣事禮部尚書劉春曰  
無害於若而可教孝奏許之浚後遷山東鹽運司同知  
娶繼妻私其二奴浚聞將治之遂暴卒檄心疑未發奴  
遽亡去久之偵一奴逃德化縣傭巨姓家檄微行往伺  
奴出袖鐵椎擊殺之而其一不可跡矣檄不欲見繼母  
葬父畢號慟曰父讐尚在何以為人乃裂衣冠屏妻子  
出宿郊墟間蓬首垢面饑寒風雨不知就避親戚故人

率目之為狂櫟終不自明也子壽卒不哭或詰之則垂涕曰我不能為子敢為父乎繼母卒乃歸蓋自廢自罰者三十五年又十五年而卒

楊成章道州人父泰為浙江長亭巡檢妻何氏無出納丁氏女為妾生成章甫四歲泰卒何將扶櫬歸丁氏父子之子而奪其母母乃剪銀錢與何別約各藏其半俟成章長授之越六年何臨歿授成章半錢告之故成章嗚咽受命既冠娶婦月餘即執半錢之浙中尋母母先

已適東陽郭氏生子曰珉而成章不知也徧訪之無所  
遇而還弘治十一年東陽典史李紹裔以事宿珉家珉  
母知為道州人遣珉問成章存否知成章已為諸生乃  
令珉執半錢覓其兄會有會稽人官訓導者嘗設教東  
陽為珉師與成章述珉母憶子狀成章亦往尋母遇珉  
於江西舟次兄弟悲且喜各出半錢合之益信遂俱至  
東陽母子始相聚自是成章三往迎母不遂棄月廩赴  
東陽侍養及母卒廬墓三載始返至嘉靖十年成章以

歲貢入都珉亦以事至乃述成章尋親事上之吏部請  
進一官部臣言成章孝行兩地已勘實登之朝覲憲網  
珉言非謬昔朱壽昌棄官尋母宋神宗詔令就官今所  
司知而不能薦臣等又拘例而不請旌真有愧於古誼  
請量授成章國子學錄賜珉花紅羊酒制曰可

謝用字希中祁門人父永貞生母馬氏方妊永貞客外  
嫡母汪氏妒而嫁之遂生用永貞還大恨抱用歸寄乳  
隣媼汪氏收而自鞠之踰年亦生子均愛無厚薄用既

冠始知所生密訪之則又改適不知其所矣用遍覓幾一載一夕宿休寧農家有寡嫗出問曰若為誰用告以姓名及尋母之故曰若母為誰曰馬氏曰若非永貞之子乎曰然嫗遂抱用曰我即汝母也於是母子相持而哭時弘治十五年四月也用歸告父并其同母弟迎歸居別室孝養二母曲盡其誠後汪感悔令迎馬同居訖無間言永貞卒用居喪以孝聞隣人失火延數十家將至用舍風反火息用時為諸生督學御史廉其孝列之

德行優等月廩之

何競字邦植蕭山人父舜賓為御史謫戍廣西慶遠衛  
遇赦還好持吏短長有鄒魯者當塗人亦以御史謫官  
稍遷蕭山知縣貪暴狡悍舜賓求魯陰事許之兩人互  
相猜縣中湘湖為富人私據舜賓發其事於官奏覈之  
富人因奏舜賓以戍卒潛逃擅自冠帶章竝下所司覈  
治魯隱其文牒詭言舜賓遇赦無驗宜行原衛查核上  
官不可駁之會舜賓門人訓導童顯章為魯所陷論死

下府覆驗道舜賓家魯陰使押顯章過之詔曰舜賓乃  
敢竄重囚發卒圍其門執捕舜賓徑解慶遠又令爪牙  
吏屏其衣服至餘干宿昌國寺夜以濕衣閉其口壓殺  
之魯復捕舜賓妻子競與母逃常熟匿父友王鼎家已  
而魯遷山西僉事將行競乃潛歸與族人謀召親黨數  
十人飲之酒為舜賓稱冤中坐競出叩首哭以請皆踴  
躍願效命乃各持器伏道旁伺魯過競袖鐵鎚奮擊騎  
從駭散仆其輿裸之杖齊下矐兩目鬚髮盡拔競拔佩



刀砍其左股必欲殺之為衆所止乃與魯連鎖赴按察司而預令族父澤走闕下訴冤僉事蕭翀故黨魯巖刑訊競競大言曰必欲殺我我非畏死者顧人孰無父母且我已訟於朝非公輩所得擅殺噬臂肉擲案上含血嚙翀面一堂皆驚會競疏已上遣刑部郎中李時給事中李舉會巡按御史鄧璋雜治諸人持兩端擬魯故屏人衣食至死競部民毆本屬知縣罵疾律俱絞餘所逮數百人擬罪有差競母朱氏復搥登聞鼓訴冤魯亦使

人馳訴乃命大理寺正曹廉會巡按御史陳銓覆治廉  
曰爾等何毆縣官競曰競知父讐不知縣官但恨未殺  
之耳廉以致死無據遣縣令揭棺驗之驗者報傷而解  
役任寬慷慨首實且出舜賓臨命所付血書於是衆皆  
辭伏改擬魯斬競徒三年法司議競遣戍且曰魯已成  
篤疾競為父報讐律意有在均俟上裁帝從其議戍競  
福寧衛時弘治十四年二月也後武宗登極肆赦魯免  
死競赦歸又九年卒競自父歿至死凡十六年服衰終

其身

王原文安人正德中父珣以家貧役重逃去原稍長問父所在母告以故原大悲慟乃設肆於邑治之衢治酒食舍諸行旅遇遠方客至則告以父姓名年貌冀得父踪跡久之無所得既娶婦月餘跪告母曰兒將尋父母泣曰汝父去二十餘載存亡不可知且若父眊耳流落何所誰知名者無為父子相繼作羈鬼使我無依原痛哭曰幸有婦陪母母無以兒為念兒不得父不歸也號

泣辭母去。遍歷山東南北去來者數年。一日渡海至田橫島。假寐神祠中。夢至一寺。當午炊菹和肉羹。食之一老父至。驚覺。原告之夢。請占之。老父曰。君何為者。曰。尋父。老父曰。午者正南位也。莎根附子肉和之。附子膾也。求諸南方父子其會乎。原喜謝去。而南踰洛漳至輝縣。帶山有寺曰夢覺。原心動。天雨雪寒甚。卧寺門外。及曙。一僧啟門出。駭曰。汝何人。曰。文安人。尋父而來。曰。識之乎。曰。不識也。引入禪堂。憐而予之粥。珣方執爨竈下。僧

知為文安人謂之曰若同里有少年來尋父者若倘識  
其人珣出見原皆不相識問其父姓名則王珣也珣亦  
呼原乳名相抱持慟哭寺僧莫不感動珣曰歸告汝母  
我無顏復歸故鄉矣原曰父不歸免有死耳牽衣哭不  
止寺僧力勸之父子相持歸夫妻子母復聚後原子孫  
多仕宦者

黃璽字廷璽餘姚人兄伯震商十年不歸璽出求之經  
行萬里不得踪跡最後至衡州禱南岳廟夢神人授以

纏綿盜賊際狼狽江漢行二句一書生告之曰此杜甫  
春陵行詩也春陵今道州曷往尋之璽從其言既至無  
所遇一日入廁置傘道旁伯震適過之曰此吾鄉之傘  
也循其柄而觀見有餘姚黃廷璽記六字方疑駭璽出  
問訊則其兄也遂奉以歸

歸鉞字汝威嘉定人早喪母父更娶繼妻有子鉞遂失  
愛父偶撻鉞繼母輒索大杖與之曰母傷乃翁力也家  
貧食不足每炊將熟即譏譏數鉞過父怒而逐之其母

子得飽食餓飢困匍匐道中叱歸父母相與言曰有子  
不居家在外作賊耳輒復杖之屢瀕於死及父卒母益  
擯不納因販鹽市中時私其弟問母飲食致甘鮮焉正  
德三年大饑母不能自活餓涕泣奉迎母內自慚不欲  
往然以無所資近從之餓得食先母弟而已有飢色弟  
尋卒餓養母終其身嘉靖中卒族子繡亦販鹽與二弟  
紋緯友愛緯數犯法繡輒罄貲護之終無愠色繡妻朱  
製衣必三襲曰二叔無室豈可使郎君獨暖耶里人稱

為歸氏二孝子

何麟沁水人為布政司吏武宗微行由大同抵太原城門閉不得入怒及還京遣中官逮守臣不啟門者巡撫以下皆大懼麟曰朝廷未知主名請厚賄中官麟與俱往即聖怒不測麟一身獨當之及抵京上疏曰陛下巡幸晉陽司城門者實臣麟一人他官無預也臣不能啟門迎駕罪當萬死但陛下輕宗廟社稷而事巡遊且易服微行無清道警蹕之詔白龍魚服臣下何由辨焉昔



漢光武夜獵至上東門守臣鄧暉拒弗納光武以暉能  
守法而賞之今小臣欲守鄧暉之節而陛下乃有不敬  
之誅臣恐天下後世以為臣之不幸不若鄧暉陛下寬  
仁之量亦遠遜光武也疏入帝怒稍解廷杖六十釋還  
餘不問巡撫以下郊迎禮敬之

孫清睢陽諸生也幼孤事母孝母歿未葬流賊入其境  
居民盡逃清獨守柩不去賊兩經其門皆不入里人多  
賴以全正德九年四月河南巡按御史江良貴奏聞并

言清同邑徐儀女雪梅嚴清女銳兒皆不受賊污憤罵  
見殺沐陽諸生沈麟以知府劉祥縣丞程儉為賊所執  
挺身詣賊開陳利害願以身代賊義之二人獲釋凡此  
義烈有關風化宜如制旌表章下禮官先是八年二月  
山東巡按御史張璿奏賊所過州縣有子救父婦衛夫  
罹賊兵刃者凡百十九人皆宜旌表時傅珪代費宏為  
禮部言所奏人多費廣宜準山西近例於所在旌善亭  
側建二石碑分書男婦姓名邑里及其孝義貞烈大畧

以示旌揚有司量給殯殮費厥後地方有奏悉以此令從事帝可之至是良貴奏下劉春代珪為禮部竟不請旌但用珪前議并給銀建坊之令亦不復行而旌善之意微矣當是時濮州諸生宋顯章浙川諸生李豫皆以孝行著聞流賊過其門不敢犯里人亦多賴以全而顯章之死也其妻辛氏自縊以殉知州李緝為建孝節坊並祠祀嘉靖七年豫獨被旌

劉憲靈石諸生也父先亡母年七十餘兩目俱瞽憲奉

事惟謹正德六年流賊入城憲負母避之城外賊追至欲殺母憲哀告曰寧殺我母害我母賊乃釋之行至嶺後憲竟為他賊所殺賊縱火焚民居獨憲宅隨熱隨滅同時羅璋遂寧諸生大盜亂蜀中母為賊所獲璋手挺長鎗連斃三賊賊舍母去後賊追至璋力捍賊久之力疲竟被執賊憤甚剜心剖肝裂其屍竝正德中旌表有李壯丁者安定縣人嘉靖中北寇入犯從父母奔避山谷遇賊縛母去壯丁取石奮擊母得脫前行復遇五賊

一賊縛其母母大呼曰免速去母顧我壯丁憤手提鐵  
器擊仆賊母得逃而壯丁竟為賊所殺正德中賊掠鉅  
鹿執趙智趙慧之母將殺之智追至跪告曰母年老願  
殺我慧亦至泣曰兄年長願留養母而殺我智方與爭  
死而母復請曰吾老當死乞留二子羣賊笑曰皆好人  
也泣釋之

容師偃香山父患癰疾扶持不離側正德十二年寇  
掠其鄉師偃負父而逃追者急父麾使遜泣曰父子相

為命去將安之俄被執賊灼其父師偃號泣請代賊從  
之父得釋而師偃焚死後有劉靜者萬安諸生嘉靖間  
流賊陷其縣負母出奔遇賊將殺母靜以身翼蔽求代  
死賊怒攢刃殺之猶抱母不解屍閱七日不變萬歷元  
年旌表又有溫鉞者大同人父景清有膽力嘉靖三年  
鎮兵叛殺巡撫張文錦其後巡撫蔡天祐令景清密捕  
首惡戮數人其黨恨之十二年復叛殺繼兵李瑾因遍  
索昔年為軍府効命者景清深匿不出遂執鉞及其母

王氏以去令言景清所在鉞曰爾欲殺我父而使  
我言其處是我殺父也如讐不可解則殺我舒憤足矣賊不  
聽逼母使言母大罵不輟賊怒支解以怵鉞鉞大哭且  
罵并被殺事平母子竝獲旌

俞孜字景修浙江山陰人為諸生敦行誼嘉靖初父華  
充里役解流人徐鐸至口外鐸毒殺華亡走孜扶觀歸  
誓必報讐蹤跡數十郡不可得後聞已還鄉匿其甥楊  
氏家乃結力士十數人佯為賣魚往來偵伺且謁知府

南大吉乞助大吉義之遺數健卒與俱夜半驟率卒入楊氏家呼鐸出見縛送於官寘諸法攷自是不復應舉養繼母以終有張震者餘姚農家子也生周歲父為人所陷將死齧震指語曰某吾讐也汝勿忘震長而指瘡不愈母告以故震誓必報其友謂曰汝力弱吾為汝殺之未幾讐乘馬出友以田器擊之即死震喜走告父墓已而事發有司傷其志減死論戍遇赦歸孫文亦餘姚人也幼時父為族人時行箠死長欲報之而力不敵乃



偽與和好共武斷鄉曲時行坦然不復疑一日值時行於田間即以田器擊殺之坐戍未幾遇赦獲釋

崔鑑京師人父嗜酒狎娼召與居娼恃寵時時陵鑑母父又被酒數侵辱之一日娼惡言詈母母復之娼遂擊敗母面母不勝憤入室伏牀而泣將自盡鑑時年十三自學舍歸問之母告以故鑑曰母無死即走至學舍挾刃還娼適埽地且埽且詈鑑拔刃刺其左脇立斃乃匿刃牖下亡走數里忽自念曰父不知我殺娼必累我母

急趨歸父果訴於官將繫其母矣鑑至告捕者曰此我所為非母也衆見其幼不信鑑曰汝等不信請問凶器安在自出刃示之衆乃釋母繫鑑寘獄事聞下刑部讞尚書聞淵等議鑑志在救母且年少可矜難拘常律帝亦貸其罪

唐儼全州諸生也父蔭郴州知州歸老得危疾儼年十二潛割臂肉進之疾良已及父歿哀毀如成人其後游學於外嫡母寢疾儼妻鄧氏年十八奮曰吾婦人安知

湯藥昔夫子以臂內療吾舅吾獨不能療吾姑哉於是  
割脇肉以進姑疾亦愈儼聞母疾馳歸則無恙久矣拜  
其妻曰此吾分也當急召我何自苦如此妻曰子事父  
婦事姑一也方危急時召子何及且事必待子安用婦  
為儼益歎異嫡母歿二十年而生母歿儼廬墓三年嘉  
靖四年貢至京有司奏旌其門

邱緒字繼先鄆縣諸生也生母黃為嫡余所逐適江東  
包氏未幾轉適他所遂不復相聞緒年十五父歿事余

至孝余疾謹奉湯藥不解衣帶者數月余重感其孝病革與訣曰我即死汝無忘若母時母被逐已二十年矣一夕夢人告曰若母在台州金鰲寺前覺而識之次日與一人憩於途詰之則包氏故養馬廐也叩以母所向曰有周平者曾悉其事今已成京衛矣緒姊壻謁選在京遺書囑訪平久之未得一日有避雨於邸門者其聲類鄭人叩之即周平也言黃已適台州李副使子緒得報即之台而李已歿其嗣子漫不知前事緒徬徨掩泣

於道有傷之者導謁老媒妁王四曰已再適仙居吳義  
官吳仙居巨族也緒至歷閭數十家無所遇已而抵一  
儒生吳秉朗家語之故生感其意留止焉有叔母聞所  
留者異鄉人也恚而咻之生告以緒意叔母者黃故主  
母也頗憶前事然不詳所往呼舊蒼頭問之云金鰲寺  
前去歲經之棺已殯寺旁矣緒以其言與夢合信之行  
且泣牛觸之墜於溝則輿夫馬長之門也駭而出問所  
從來緒以情告長曰吾前輿一婦至縉雲蒼巖下殆是

也輿緒至其處緒徧物色無所遇張行委巷中一媼立門外探之知為鄆人告以所從來媼亦轉詢邱氏耗則緒母也抱持而哭閭里皆感動寺旁棺者益其如氏云所適陳翁貧而無子且多負緒還取金償之并迎翁以歸備極孝養嘉靖十四年知縣趙民順入覲疏聞於朝獲旌表

張鈞石州人父赦國子生以二親早亡矢志不仕隱居城北村鈞正德末舉於鄉以親老亦不仕讀書養親遠

近皆稱其孝嘉靖二十年諳達犯石州鈞慮父遭難自  
城中馳一騎號泣赴救寇射中其肩裹瘡疾馳至則父  
已被殺鈞隕絕盡飮父血水漿不入口三日不勝悲痛  
而卒越二年有司上其狀獲旌是時殺掠甚慘石州為  
親死者十一人而張承相于博張永安尤著承相少孤  
及長為諸生養母二十餘年以孝聞寇至負母出逃為  
所得叩頭號泣乞免其母寇怒并殺之抱母首死博二  
歲而孤奉母盡孝寇抵城下博方讀書城中母居村舍

亟下城號泣求母母已被執遇諸途博取石奮擊寇寇就剖其心母得逸去年止十有八永安石州吏也父為寇所逐永安持梃追擊之傷二賊趣父逸去而身自後衛之被數十創死與鈞同被旌有溫繼宗者沁州諸生父卒不能葬日守柩哀泣嘉靖二十一年寇入犯或勸出城避難以父殯不肯去寇至與叔父淵等力禦擊傷一賊中天死柩旁淵等皆死亦與鈞同被旌

王在復太倉人年二十一從父讀書城外倭寇入犯父



子亟奔入城父體肥不能速行中道遇賊遂相失在復走二里許展轉尋父聞父被執急趨賊所叩頭求免賊不聽拔刃擬其父在復以身蔽之痛哭哀求賊怒并殺之兩首墜地而手猶抱父不釋時嘉靖三十三年五月也當是時倭亂東南孝子以衛父母見殺者甚衆其得旌於朝者在復及黃巖王錡慈谿向叙無錫蔡元銳丹徒殷士望鐸隨父顯避賊顯被執將殺之鐸亟趨前請代賊遂殺鐸而釋顯叙為慈谿諸生倭入寇以縣無城

拔母出避遇賊踣叙而斫其母叙急起抱母頸大呼曰  
寧殺我母殺我母賊如其言母獲全俱嘉靖三十五年  
旌表元銳無錫人與弟元鐸並孝友倭犯無錫入元銳  
家兄弟急扶父升屋避匿而元銳為賊執令言父所在  
堅不從遂見殺元鐸不知兄死明日持重貲往贖并見  
殺嘉靖三十八年旌表士望丹徒人事親孝倭犯京口  
父被掠士望請代死賊笑而試之火炙刀刺受之怡然  
賊兩釋之嘉靖四十三年旌表其他未及旌表者又有

陳經字龔可正伍民憲經字平陽人倭至負母出逃遇賊索母珥環欲殺之經孚以身翼蔽賊怒揮刃截耳及肩而死手猶抱母頸不解可正嘉定諸生負祖母避賊天雨泥濘猝遇賊賊惡見婦人欲殺其祖母叱可正去可正跪泣請代賊不從可正以身覆祖母賊泣殺之民憲晉江人扶父避難遇賊長跪哀告曰勿驚我父他物任取之賊不聽竟殺其父民憲憤挺身殺二賊傷數賊賊至益多斷民憲右手卧草中猶一手執戈呼其父三

日而絕

夏子孝字以忠桐城人六歲失母哀哭如成人九歲父得危疾禱天地刲股六寸許調羹以進父食之頓愈翌日子孝痛創父詰其故始知之里老以聞於官知府胡麟先夢王祥來謁詰旦而縣牒至訖曰孺子其祥後身耶召見易其舊名恩曰子孝督學御史胡植即令入學為諸生月廩之麟復屬貢士趙簡授之經嘉靖末父卒廬墓獨居荒山身無完衣形容槁瘁後歷事王畿羅汝

芳史桂芳耿定向獲聞聖賢之學定向為督學御史將  
疏聞於朝固辭曰不肖不忍以亡親賈名乃止將死命  
其子曰葬我父墓側

阿寄者淳安徐氏僕也徐氏昆弟析產而居伯得一馬  
仲得一牛季寡婦得阿寄時年五十餘矣寡婦泣曰馬  
則乘牛則耕老僕何益寄嘆曰主謂我不若牛馬耶乃  
晝策營生示可用狀寡婦盡脫簪珥得白金十二兩畀  
寄寄入山販漆期年而三倍其息謂寡婦曰主無憂富

可致矣歷二十年積資巨萬為寡婦嫁三女婚二子齋聘皆千金又延師教二子輸粟為太學生自是寡婦財雄一邑及寄病且死謂寡婦曰老奴牛馬之報盡矣出枕中二籍則家鉅細悉均分之曰以此遺兩郎君可世守也既歿或疑其有私竊啟其篋無一金蓄所遺一嫗一兒僅敝緼掩體而已

趙重華雲南太和人七歲時父廷瑞遊江湖間久不返重華長謁郡守請路引榜其背曰萬里尋親別書父年

貌邑里數千紙所歷都會州縣徧張之西禱武當山經  
太子巖巖陰有字曰嘉靖四十四年十二月十二日趙  
廷瑞朝山至此重華讀之慟曰吾父果過此今吾之來  
月日正同可卜相逢矣遂書其後曰萬歷六年十二月  
十二日趙廷瑞之子重華尋父至此久之竟無所遇過  
丹陽盜攫其資所遺獨路引且行且乞遇一老僧呼問  
其故笑曰汝父客無錫南禪寺中語訖忽不見重華急  
趨至寺果其父出路引示之相與慟哭留數日乃還雲

南是時有謝廣者祁門人父求仙不返廣娶婦七日即別母求父過於閭封逆旅中父乘間復脫去廣跋涉四方者垂二十年終不得父聞者哀之

王世名字時望武義人父良與族子俊同居爭屋為俊毆死世名年十七恐殘父屍不忍就理乃佯聽其輸田議和凡田所入輒易價封識俊有所覬亦佯受之而潛繪父像懸密室繪已像於旁帶刀侍朝夕泣拜且購一刀銘報讐二字母妻不知也服闋為諸生及生子數月



謂母妻曰吾已有後可以死矣一日俊自外醉歸世名挺刃迎擊之立斃出號於衆入白母即取前封識者詣吏請死時萬厯九年二月去父死六年矣知縣陳某曰此孝子也不可置獄別館之而上其事於府府檄金華知縣汪大受來訊世名請死大受曰檢屍有傷爾可無死曰吾惟不忍殘父屍以至今日不然何待六年乞放歸辭母乃就死許之歸母迎而泣世名曰身者父之遺也以父之遺為父死雖離母得從父矣何憾頃之大受

至縣人奔走直世名者以千計大受乃令人舁致父棺將開視之世名大慟以頭觸堦石血流殷地大受及旁觀者咸為隕涕乃令舁柩去將白上官免檢屍以全孝子世名曰此非法也非法無君何以生為遂不食而死妻俞氏撫孤三載自縊以殉旌其門曰孝烈

李文詠崑山諸生父大經故沂水令萬厯二十七年父寢室被火文詠突入將父抱出而櫬棟盡覆父子俱焚死火息入視屍猶覆其父父存全體文詠但餘一股王

應元武隆人力農養父父醉卧家失火應元自外趨烈焰中竟不能出抱父死唐治黃岡人父樞在堂鄰居火治盡出資財募人舁樞人各自顧無應者或挽之出泣曰父樞在此我死不出火息後堂歸然獨存樞亦無恙而治竟熏灼伏樞死萬厯中旌表許恩蘄水人夜半鄰家失火恩驚出徧尋母不得復突入遂與母俱焚馮象臨慈谿諸生家被火徧覓父母烟焰彌空迷失庭戶象臨大呼初得母即從火中負出再入負父并挾一弟以

出半體已焦爛間妹尚留卧内母號呼將自入亟止之  
觸烈焰攜妹出竟灼爛而死事聞賜旌後有龔作梅者  
陳州人年十七父母俱亡殯於舍闔賊火民居作梅跪  
柩前焚死

孔金山陽人父早亡母謝氏遺腹三月而生金母為大  
賈杜言逼娶投河死金長屢訟於官不勝言行賄欲斃  
金金乃乞食走闕下擊登聞鼓訴冤不得還墓所晝  
夜號泣里人劉清等陳其事於府知府張守約異之召

閭族媒氏質實坐言大辟未幾守約卒言實緣免金復  
號訴不已被笞無完膚已而撫按理舊牘仍坐言大辟  
迄死獄中金子良亦有孝行父病判股為羹以進旋愈  
此卒廬墓哀毀萬厯四十三年父子竝得旌

楊通照通杰銅仁人母周氏有疾兄弟爭拜禱求以身  
代閹三年不入內室萬厯三十六年羣苗流劫至其家  
母被執去二人追鬪數十里被傷不顧至鬼空溪見賊  
繫母大罵聲震山谷橫擊萬衆中為賊所磔死通照年

二十五通杰年二十二泰昌元年巡撫李橧巡按史永安上其事旌曰雙孝之阿時無錫民浦邵賊縛其父虞將殺之邵以首迎刃而死父得免寧化民林上元賊掠其繼母李氏出城上元從城上持鎗一躍而下直奔賊壘刺死二人賊避其鋒立出李氏因引去城賴以全皆萬厯四十三年旌崇禎七年流賊陷孖溪執知縣余霄將殺之子諸生伯麟請代乃免

張清雅潛山人家貧力學養親崇禎十年張獻忠來犯

清雅以父年老卧病守之不去無何父卒歛甫畢賊入其家疑棺內藏金銀欲剖視之清雅據棺哀泣賊斷其手仆地幼子超藝年十六號哭求代賊復砍之父子俱死而棺得不剖僕雲滿具兩棺斂之亦不食死時有白精忠者潁州人五歲而孤母袁氏撫之家貧母食糠覈而以精者哺兒精忠知之每餐必先啖其惡者天啟中舉於鄉崇禎八年流賊陷潁州家人勸逃匿精忠以母年老不忍獨去遂遇害州有檀之槐者護母柩不去與

賊格鬪殺數人被磔死又有李心唯素敦孝行賊至泣  
守母喪賊掠其室將縛之不出被殺子果見父死厲聲  
罵賊賊又殺之有余承德者無為人崇禎十五年流賊  
突至掠其祖母劉氏母魏氏及妻楊氏妹玉女出避祖  
母母行遲為盜所獲欲刃之承德號呼救護竝遇害楊  
氏見之急投河死賊將犯玉女玉女大罵堅不從寸磔  
而死

明史卷二百九十七



欽定四庫全書

明史卷二百九十七考證

傳檄傳福建南安人

福建舊本作泉州

臣

章宗瀛

按地理志南安府屬江西南安縣屬福建此書泉州  
南安即福建之南安也但考各傳文內無載府名者  
此書泉州於體例未符謹改

謝用傳抱用歸寄乳隣媼

臣

章宗瀛按獻徵錄用父

永貞納妾馬氏生一女永貞客外嫡苦之遣歸母家

改適乎溪時馬氏已孕四月矣月足姪生即用也明年永貞歸快然於懷其伯父廢翁曰婦去而子存亦不幸之幸也永貞即抱歸寄乳隣母孫氏所紀較詳謹附考

何競傳道舜賓家魯陰使押顯章過之詔曰舊本作道經舜賓家入與謀魯聞之大詔曰臣章宗瀛按浙江通志何競傳是時顯章下府覆驗道舜賓家魯噉解人押顯章過舜賓隨遣皂捕等五百餘人執器圍

其家曰舜賓篡取重囚云云蓋魯既與舜賓讎又設計陷顯章於重辟豈容其入與之謀乎謹據改

解役任寬慷慨首實且出舜賓臨命所付血書

臣章

宗瀛按浙江通志血書作血衣任寬作任觀與此紀

異謹附考

王原傳既娶婦月餘跪告母曰兒將尋父

臣章宗瀛

按王原母張氏妻段氏見文安縣志謹附識

夫妻子母復聚後原子孫多仕宦者

臣章宗瀛按原

父珣歸時年已六十有四原生男六人孫男十有五  
曾孫男二十有二俱業耕讀有司嘉原行以壽官榮  
之見文安縣志謹附識

歸鉞傳嘉定人早喪母父更娶 舊本嘉定下有縣字  
娶上無更字臣章宗瀛據各傳文例俱無縣字謹刪  
以歸畫一下文父娶繼妻句加一更字以補空缺

何麟傳武宗微行由大同抵太原城門閉不得入怒及  
還京 舊本及字作而字臣章宗瀛按武宗本紀正

德十三年八月如大同九月次偏頭關十月次榆林  
十一月次綏德十二月戊寅幸石州戊子次太原十  
四年正月丙申朔帝在太原壬子還宣府二月壬申  
至自宣府計十二月戊子次太原至次年正月壬子  
還宣府是帝在太原共二十五日矣且先還宣府後  
由宣府還京此傳云門閉不得入怒而還京所紀似  
失實蓋當時江彬等方導帝遊幸朝臣切諫尚不能  
阻又觀彬傳稱抵太原大徵女樂或初未及問還京

之後始追問舊事耳謹改

容師偃傳十二年 舊本三作二 臣章宗瀛按大同兵

叛殺總兵官李瑾考在嘉靖十二年此作十三年係刊本  
之訛謹據改

崔鑑傳父嗜酒狎娼召與居娼恃寵時時陵鑑母 臣

章宗瀛按鑑父名佑母王氏娼魏氏見獻徵錄謹附  
識

匿刃牖下 臣章宗瀛按獻徵錄作匿刃牖下原刻作

牖下誤謹據改

唐儼傳嫡母歿二十年而生母歿

臣

章宗瀛按獻徵

錄儼事嫡母蒙氏甚謹生母宋氏事之兼隆而儀節  
飲食較殺焉曰禮不可踰也謹附考

貢至京有司奏旌其門

臣

章宗瀛按儼少入鄉校至

是學使知其孝行錄為廩生並以粟帛給其妻先是  
觀風者多重儼欲上其事於朝儼辭曰事親以盡吾  
心耳使以親故得名非儼志也後至京肄業南雍有

司秦旌之儼終於太學云見獻徵錄謹附考

邱緒傳事余至孝

臣章宗瀛按獻徵錄緒太學生鑑

之次子嫡產兄經及弟綸俱客京師後余病革緒獨侍湯藥衣不解帶余感動云云謹附識

疏聞於朝獲旌表

臣章宗瀛按獻徵錄緒弱冠補邑

庠弟子員食廩祿者二十餘年累舉不第需次及貢矣忽感火疾旬餘而死年六十有二謹附考

王在復傳從父讀書城外

臣章宗瀛按獻徵錄在復



父名亮燾傳未詳載謹附考

時嘉靖三十三年五月也

臣章宗瀛按獻徵錄作五

月初九日謹附考

王世名傳時萬曆九年二月

臣章宗瀛按獻徵錄云

萬曆九年正月事此作二月所紀互異謹附考

李文詠傳故沂水令

舊本作沂水知縣

臣章宗瀛按

獻徵錄文詠父大經原任沂水知縣原任二字於史

傳文法當作故沂水知縣史無故字則下文寢室被

火似在官署矣謹增故字並改知縣為令以敷勻刻

明史卷二百九十七考證

欽定四庫全書

明史卷二百九十八

大學士張廷玉等奉 敕修

列傳第一百八十六

隱逸

韓愈言蹇之六二曰王臣蹇蹇而蠱之上九曰高尚其事由所居之時不一而所蹈之德不同夫聖賢以用世為心而逸民以肥遯為節豈性分實然亦各行其志而

已明太祖興禮儒士聘文學搜求巖穴側席幽人後置  
不為君用之罰然韜迹自遠者亦不乏人迨中葉承平  
聲教淪浹魏科顯爵頓天網以羅英俊民之秀者無不  
觀國光而賓王廷矣其抱瓌材蘊積學槁形泉石絕意  
當世者靡得而稱焉由是觀之世道升降之端係所遭  
逢豈非其時為之哉凡徵聘所及文學行誼可稱者已  
散見諸傳茲取貞節超邁者數人作隱逸傳

張介福

倪瓚

徐舫

楊恒陳洄

楊引

吳海

劉閔

楊黼

孫一元

沈周

陳繼儒

張介福字子祺自懷慶徙吳中少受學于許衡二親早終遂無仕進意家貧冬不能具夾襦或遺以紵絮不受纖介必以禮張士誠入吳有卒犯其家危坐不為起刀

斫面仆地醒復取冠戴之坐自若卒怪以為異物走去  
介福恐發其先墓往廬焉士誠聞而欲致之不可使其  
弟往問答曰無樂亂無貪天禍無忘國家饋之力辭已  
病革謂其友曰吾志希古人未能也惟無污於時庶幾  
哉遂卒

倪瓚字元鎮無錫人也家雄于貲工詩善書畫四方名  
士日至其門所居有閣曰清閬幽迴絕塵藏書數千卷  
皆手自勘定古鼎法書名琴奇畫陳列左右四時卉木

縈繞其外高木修篁蔚然深秀故自號雲林居士時與  
客觴咏其中為人有潔癖盥濯不離手俗客造廬比去  
必洗滌其處求鱸素者踵至瓚亦時應之至正初海內  
無事忽散其貲給親故人咸怪之未幾兵興富家悉被  
禍而瓚扁舟箬笠往來震澤三泖間獨不罹患張士誠  
累欲鈎致之逃漁舟以免其弟士信以幣乞書瓚又斥  
去士信恚他日從賓客遊湖上聞異香出葭葦間疑為  
瓚也物色漁舟中果得之扶幾斃終無一言及吳平瓚

年老矣黃冠野服混迹編氓洪武七年卒年七十四  
徐舫字方舟桐廬人幼輕俠好擊劍走馬蹴踘既而悔  
之習科舉業已復棄去學為歌詩睦故多詩人唐有方  
干徐凝李頻施肩吾宋有高師魯滕元秀號睦州詩派  
舫悉取步驟之既乃遊四方交其名士詩益工行省參  
政蘇天爵將薦之舫笑曰吾詩人耳可羈以章綬哉竟  
避去築室江皋日苦吟於雲烟出沒間翛然若與世隔  
因自號滄江散人宋濂劉基葉琛章溢之赴召也舟溯



桐江忽有人黃冠鹿裘立江上抬基而笑且語侵之基望見急延入舟中琛溢兢謹謔各取冠服服之欲載上黥川其人不可乃止漁初未相識以問基曰此徐方舟也漁因起共歡笑酌酒而別舫詩有瑤林滄江二集年六十八以疾卒於家

楊恒字本初諸暨人外族方氏建義塾館四方遊學士恒幼往受諸經輒領其旨要文峻潔有聲郡邑間浦江鄭氏延為師閱十年退居白鹿山戴椶冠披羊裘帶經

耕烟雨間嘯歌自樂因自號白鹿生太祖既下浙東命  
樂鳳知州事鳳請為州學師恒固讓不起鳳乃命州中  
子弟即家問道政有缺失輒貽書咨訪後唐鐸知紹興  
欲辟起之復固辭宋濂之為學士也擬薦為國子師聞  
不受州郡辟命乃已恒性醇篤與人語出肺肝相示事  
稍乖名義輒峻言指斥家無儋石而臨財甚介鄉人奉  
為楷法焉時有陳洄者義烏人幼治經長通百家言初  
欲以功名顯既而隱居戴青霞冠披白鹿裘不復與塵

事接所居近大溪多修竹自號竹溪逸民常乘小艇吹短簫吹已叩舷而歌悠然自適宋濂俱為之傳

楊引吉水人好學能詩文為宋濂陶安所稱駙馬都尉陸賢從受學入朝舉止端雅太祖喜問誰教者賢以引對立召見賜食他日賢以褻服見引太息曰是其心易我不可久居此矣復以纂修徵亦不就其教學者先操履而後文藝嘗揭論語鄉黨篇示人曰吾教自有養生術安事偃仰吐納為乃節飲食時動息迄老視聽不衰

既歿安福劉球稱其學探道原文範後世去就出處卓然有陶潛徐穉之風

吳海字朝宗閩縣人元季以學行稱值四方盜起絕意仕進洪武初守臣欲薦諸朝力辭免既而徵詣史局復力辭嘗言楊墨釋老聖道之賊管商申韓治道之賊稗官野乘正史之賊支詞艷說文章之賊上之人宜敕通經大臣會諸儒定其品目頒之天下民間非此不得輒藏坊市不得輒粥如是數言學者生長不涉異聞其於

養德育才豈曰小補因著書一編曰書禍以發明之與  
永福王翰善翰嘗仕元海數勸之死翰果自裁海教養  
其子偁卒底成立平居虛懷樂善有規過者欣然立改  
因顏其齋曰聞過為文嚴整典雅一歸諸理後學咸宗  
仰之有聞過齋集行世

劉閔字子賢莆田人生而純慤早孤絕意科舉求古聖  
賢裋躬訓家之法率而行之祖母及父喪未舉斷酒肉  
遠室家訓徒鄰邑朔望歸號哭殯所如是三年婦失愛

於母出之獨居奉養疾不解衣母或恚怒則整衣竟夕  
跪榻前祭享奠獻一循古禮鄉人莫不欽重副使羅璟  
立社學構養親堂延閔為師提學僉事周孟中捐俸助  
養知府王弼每祭廟社必延致齋居曰此人在座私意  
自消置田二十餘畝贍之並受不辭及母歿即送田還  
官廬墓三年弟婦求分產閔闔戶自撾婦感悟乃已弘  
治中僉都御史林俊上年伏見皇太子年踰幼學習處  
宮中罕接外傳豫教之道似為未備今講讀侍從諸臣

固已簡用然百司衆職山林隱逸不為無人以臣所知則禮部侍郎謝鐸太僕少卿儲瓘光祿少卿楊廉可備講員其資序未合德行可取者二人則致仕副使曹時中布衣劉閔是也閔臣縣人恭慎醇粹孝行高古日無二粥身無完衣處之晏如監司劉大夏徐貫等恒敬禮之臣謂可禮致時中為宮僚閔以布衣入侍必能涵育薰陶裨益睿質時不能用其後巡按御史宗彞饒瑋欲援詔例舉閔經明行修閔力辭知府陳效請遂其志榮

以學職正德元年遙授儒學訓導

楊黼雲南太和人也好學讀五經皆百遍工篆籀好釋  
典或勸其應舉笑曰不理性命理外物耶庭前有大桂  
樹縛板樹上題曰桂樓偃仰其中歌詩自得躬耕數畝  
供甘饍但求親悅不顧餘也注孝經數萬言證羣書根  
性命字皆小篆所用硯乾將下樓取水硯池忽滿自是  
為常時人咸異之父母歿為傭營葬畢入雞足棲羅漢  
壁石窟山十餘年壽至八十子孫迎歸一日沐浴令子



孫拜曰明日吾行矣果卒

孫一元字太初不知何許人問其邑里曰我秦人也嘗棲太白之巔故號太白山人或曰安化王宗人王坐不軌誅故變姓名避難也一元姿性絕人善為詩風儀秀朗蹤跡奇譎烏巾白帢携鐵笛鶴瓢遍遊中原東踰齊魯南涉江淮歷荆抵吳越所至賦詩談神仙論當世事往往傾其座人鉛山費宏罷相訪之杭州南屏山值其晝寢就卧內與語送之及門了不酬答宏出語人曰吾

一生未嘗見此人時劉麟以知府罷歸龍霓以僉事謝政並客湖州與郡人故御史陸崑善而長興吳琬隱居好客三人者並主於其家琬因招一元入社稱苕溪五隱一元買田溪上將老焉舉人施侃雅善一元妻以妻妹張氏生一女而卒年止三十七琬等葬之道場山

沈周字啟南長洲人祖澄永樂間舉人材不就所居曰西莊日置酒款賓人儼之顧仲瑛伯父貞吉父恒吉並抗隱搆有竹居兄弟讀書其中工詩善畫臧獲亦解文

墨邑人陳孟賢者陳五經繼之子也周少從之遊得其指授年十一遊南都作百韻詩上巡撫侍郎崔恭面試鳳凰臺賦援筆立就恭大嗟異及長書無所不覽文摹左氏詩擬白居易蘇軾陸游字仿黃庭堅並為世所愛重尤工於畫評者謂為明世第一郡守欲薦周賢良周筮易得遯之九五遂決意隱遁所居有水竹亭館之勝圖書鼎彝充牣錯列四方名士過從無虛日風流文彩照映一時奉親至孝父歿或勸之仕對曰若不知母氏

以我為命耶奈何離膝下居恒厭入城市於郭外置行  
窩有事一造之晚年匿跡惟恐不深先後巡撫王恕彭  
禮咸禮敬之欲留幕下並以母老辭有郡守徵畫土繪  
屋壁里人疾周者入其姓名遂被攝或勸周謁貴遊以  
免周曰往役義也謁貴遊不更辱乎卒供役而還已而  
守入覲銓曹問曰沈先生無恙乎守不知所對漫應曰  
無恙見內閣李東陽曰沈先生有牘乎守益愕復漫應  
曰有而未至守出倉皇謁侍郎吳寬問沈先生何人寬

備言其狀詢左右乃畫壁生也此還謁周舍再拜引咎  
索飯飯之而去周以母故終身不遠遊母年九十九而  
終周亦八十矣又三年以正德四年卒

陳繼儒字仲醇松江華亭人幼穎異能文章同郡徐階  
特器重之長為諸生與董其昌齊名太倉王錫爵招與  
子衡讀書支硎山王世貞亦雅重繼儒三吳名下士爭  
欲得為師友繼儒通明高邁年甫二十九取儒衣冠焚  
棄之隱居崑山之陽構廟祀二陸草堂數椽焚香晏坐

意豁如也時錫山顧憲成講學東林招之謝弗往親亡  
葬神山麓遂築室東余山杜門著述有終焉之志工詩  
善文短翰小詞皆極風致兼能繪事又博文強識經史  
諸子術技稗官與二氏家言靡不較覈或刺取瑣言僻  
事詮次成書遠近競相購寫徵請詩文者無虛日性善  
獎掖士類屢常滿戶外片言酬應莫不當意去暇則與  
黃冠老衲窮峯渺之勝吟嘯忘返足跡罕入城市其昌  
為築來仲樓招之至黃道周疏稱志尚高雅博學多通

不如繼儒其推重如此侍郎沈演及御史給事中諸朝  
貴先後論薦謂繼儒道高齒茂宜如聘吳興弼故事屢  
奉詔徵用皆以疾辭卒年八十二自為遺令纖悉畢具



明史卷二百九十八



欽定四庫全書

明史卷二百九十八考證

倪瓚傳自號雲林居士

臣

章宗瀛按書畫譜云瓚別

號五曰荆蠻民爭名居士朱陽館主蕭閑仙鄉雲林  
子雲林多用以題詩畫故尤著謹附考

為人有潔癖

臣

章宗瀛按畫史會要云元鎮素有潔

癖人號倪迂謹附識

士信以幣乞畫瓚又斥去

臣

章宗瀛按書畫譜元鎮

好僧寺一住必旬日篝燈木榻蕭然宴坐時操紙筆作竹石小景客求必與一時好事者購之價值數十金張士誠弟以幣求其筆元鎮怒曰予生不為王門畫師即裂其絹而却其幣謹附考

徐舫傳年六十八以疾卒於家 舊本作丙午春卒於

家臣章宗瀛按傳中並未叙年譜干支此處突書丙

午春究未詳何代何年也考明太祖洪武元年乃在

戊申計丙午先戊申二年則尚在元順帝時矣上文

已書舫卒時年歲下復叙干支體例亦不合獻徵錄  
作以疾卒謹据改

劉閔傳訓徒鄰邑 舊本無徒字 臣章宗瀛按訓鄰邑

句文義未明謹據莆田縣志加一徒字下句一則字  
刪以數句刻

孫一元不知何許人 臣章宗瀛按獻徵錄一元閔中

人年十三誦古六經文不為舉子章句獨居一室家  
人罕窺其面十八入終南山繼入太白山 云謹附

考

時有郡守徵畫工繪屋壁

臣

章宗瀛按分省人物考作

郡守曹姓謹附考

守入覲銓曹問曰

臣

章宗瀛按分省人物考作銓曹

王問沈先生謹附考

明史卷二百九十八考證

欽定四庫全書

史部

明史卷

二百九十  
九三百

郎中<sub>臣</sub>丁雲錦覆勘

總校官編修<sub>臣</sub>朱鈐

欽定四庫全書

明史卷二百九十九

大學士張廷玉等奉 敕修

列傳第一百八十七

方伎

左氏載醫和緩梓慎裨竈史蘇之屬甚詳且核下逮巫祝亦往往張其事以神之論者謂之浮夸似矣而史記傳扁鵲倉公日者龜策至黃石赤松倉海君之流近於

神仙荒忽亦備錄不遺范蔚宗乃以方術名傳夫藝人  
術士匪能登乎道德之途然前民利用亦先聖之緒餘  
其精者至通神明叅造化詎曰小道可觀已乎明初周  
顛張三丰之屬踪蹟秘幻莫可測識而震動天子要非  
妄誕取寵者所可幾張中袁珙占驗奇中夫事有非常  
理所能拘者淺見尠聞不足道也醫與天文皆世業專  
官亦本周官遺意攻其術者要必博極於古人之書而  
會通其理沈思獨詣參以考驗不為私智自用乃足以

名當世而為後學宗今錄其最異者作方伎傳真人張氏道家者流而世蒙恩澤其事蹟關當代典故撮其大略附於篇

滑壽

葛乾孫

呂復

倪維德

周漢卿

王履

周顛

張中

張三丰

袁珙

子忠徹



戴思恭

盛寅

皇甫仲和

仝寅

吳傑

許紳  
王綸

凌雲

李王

李時珍

繆希雍

周述學

張正常

劉淵然等

滑壽字伯仁先世襄城人徙儀真後又徙餘姚幼警敏  
好學能詩京口王居中名醫也壽從之學授素問難經  
既卒業請於師曰素問詳矣多錯簡愚將分藏象經度

等為十類類抄而讀之難經又本素問靈樞其間榮衛  
藏府與夫經絡腧穴辨之博矣而缺誤亦多愚將本其  
義旨注而讀之可乎居中躍然稱善自是壽學日進壽  
又參會張仲景劉守真李明之三家而會通之所治疾  
無不中既學鍼法於東平高洞陽嘗言人身六脈雖皆  
有係屬惟督任二經則苞乎腹背有專穴諸經滿而溢  
者此則受之宜與十二經並論乃取內經骨空諸論及  
靈樞篇所述經脈著十四經發揮三卷通考隧穴六百

四十有七他如讀傷寒論抄診家樞要痔瘻篇及採諸書本草為醫韻皆有功於世晚自號櫻寧生江浙間無不知櫻寧生者年七十餘容色如童孺行步蹻捷飲酒無算天台朱右撫其治疾神效者數十事為作傳故其著述益有稱於世

葛乾孫字可久長洲人父應雷以醫名時北方劉守真張潔古之學未行於南有李姓者中州名醫官吳下與應雷談論大駭歎因授以張劉書自是江南有二家學

乾孫體貌魁碩好擊刺戰陣法後折節讀書兼通陰陽律歷星命之術屢試不偶乃傳父業然不肯為人治疾或施之輒著奇效名與金華朱丹溪埒富家女病四支痿痺目瞪不能食衆醫治罔效乾孫命悉去房中香奩流蘇之屬掘地坎置女其中久之女手足動能出聲投藥一九明日女自坎中出矣蓋此女嗜香脾為香氣所蝕故得是症其療病奇中如此

呂復字元膺鄞人少孤貧從師受經後以母病求醫遇

名醫衡人鄭禮之遂謹事之因得其古先禁方及色脈  
藥論諸書試輒有驗乃盡購古今醫書曉夜研究自是  
出而行世取效若神其於內經素問靈樞本草難經傷  
寒論脈經脈訣病原論太始天元玉冊元誥六微旨五  
常政元珠密語中藏經聖濟經等書皆有辨論前代名  
醫如扁鵲倉公華佗張仲景至張子和李東垣諸家皆  
有評隲所著有內經或問靈樞經脈箋五色診奇眩切  
脈樞要運氣圖說養生雜言諸書甚衆浦江戴良採其

治效最著者數十事為醫案歷舉仙居臨海教諭台州教授皆不就

倪維德字仲賢吳縣人祖父皆以醫顯維德幼嗜學已乃業醫以內經為宗病大觀以來醫者率用裴宗元陳師文和劑局方故方新病多不合乃求金人劉完素張從正李杲三家書讀之出而治疾無不立效周萬戶子八歲昏眊不識饑飽寒暑以土炭自塞其口診之曰此慢脾風也脾藏智脾慢則智短以疏風助脾劑投之即

愈顧顯卿右耳下生癭大與首同痛不可忍診之曰此  
手足少陽經受邪也飲之藥踰月愈劉子正妻病氣厥  
或哭或笑人以為祟診之曰兩手脉俱沉胃腕必有所  
積積則痛問之果然以生熟水導之吐痰涎數升愈盛  
架閣妻左右肩臂奇癢延及頭面不可禁灼之以艾則  
暫止診之曰左脉沉右脉浮且盛此滋味過盛所致也  
投以劑旋愈林仲實以勞得熱疾熱隨日出入為進退  
暄盛則增劇夜涼及雨則否如是者二年診之曰此七

情內傷陽氣不升陰火漸熾故溫則進涼則退投以東垣內傷之劑亦立愈他所療治多類此常言劉張二氏多主攻李氏惟調護中氣主補蓋隨時推移不得不然故其主方不執一說常患眼科雜出方論無全書著元機啟微又校訂東垣試效方並刊行於世洪武十年卒年七十五

周漢卿松陽人醫兼內外科鍼尤神鄉人蔣仲良左目為馬所踉蹌突出如桃他醫謂係絡已損不可治漢卿



封以神膏越三日復故華州陳明遠瞽十年漢卿視之  
曰可鍼也為翻睛刮翳欬然辨五色武城人病胃痛奮  
擲乞死漢卿納藥於鼻俄噴赤蟲寸許口眼悉具痛旋  
止馬氏婦有娠十四月不產誕且黑漢卿曰此中蠱非  
娠也下之有物如金魚病良已永康人腹疾病僂行漢  
卿解衣視之氣衝起腹間者二其大如臂刺其一砭然  
鳴又刺其一亦如之加以按摩疾遂愈長山徐嫗癰疾  
手足顫掉裸而走或歌或笑漢卿刺其十指端出血而

痊錢塘王氏女生瘰癧環頭及腋凡十九竅竅破白潘  
出將死矣漢卿為剔竅母深二寸其餘烙以火數日結  
痂愈山陰楊翁項有疣如瓜大醉仆階下潰血不能止  
疣潰者必死漢卿以藥糝其穴血即止義烏陳氏子腹  
有塊捫之如罌漢卿曰此腸癰也用太鍼灼而刺之入  
三寸許膿隨鍼迸出有聲愈諸暨黃生背曲須杖行他  
醫皆以風治之漢卿曰血溢也刺兩足崑崙穴項之投  
杖去其捷效如此

王履字安道崑山人學醫於金華朱彥修盡得其術嘗謂張仲景傷寒論為諸家祖後人不能出其範圍且素問云傷寒為病熱言常不言變至仲景始分寒熱然義猶未盡乃備常與變作傷寒立法考又謂陽明篇無目痛少陰篇言胸背滿不言痛太陰篇無噎乾厥陰篇無囊縮必有脫簡乃取三百九十七法去其重複者二百三十八條復增益之仍為三百九十七法極論內外傷經旨異同併中風中暑辨名曰沂泗集凡二十一篇又

著百病鈎元二十卷醫韻統一百卷醫家宗之履工詩  
文兼善繪事嘗遊華山絕頂作圖四十軸記四篇詩一  
百五十首為時所稱自滑壽以下五人皆生於元至明  
初始卒

周顛建昌人無名字年十四得狂疾走南昌市中乞食  
語言無恒皆呼之曰顛及長有異狀數謁長官曰告太  
平時天下寧謐人莫測也後南昌為陳友諒所據顛避  
去太祖克南昌顛謁道左洎還金陵顛亦隨至一日駕

出顛來謁問何為曰告太平自是屢以告太祖厭之命覆以巨缸積薪煅之薪盡啟視則無恙頂上出微汗而已太祖異之命寄食蔣山僧寺已而僧來訴顛與沙彌爭飯怒而不食且半月太祖往視顛顛無饑色乃賜盛饌食已閉空室中絕其粒一月比往視如故諸將士爭進酒饌茹而吐之太祖與共食則不吐太祖將征友諒問曰此行可乎對曰可曰彼已稱帝克之不亦難乎顛仰首眎天正容曰天上無他座太祖攜之行舟次安慶

無風遣使問之曰行則有風遂命牽舟進須臾風大作  
直抵小孤太祖慮其妄言惑軍心使人守之至馬當見  
江豚戲水歎曰水怪見損人多守者以告太祖惡之投  
諸江師次湖口顛復來且乞食太祖與之食食已即整  
衣作遠行狀遂辭去友諒既平太祖遣使往廬山求之  
不得疑其仙去洪武中帝親撰周顛仙傳紀其事

張中字景華臨川人少應進士舉不第遂放情山水遇  
異人授數學談禍福多奇中太祖下南昌以鄧禹薦召

至賜坐問曰予下豫章兵不血刃此邦之人其少息乎  
對曰未也旦夕此地當流血廬舍燬且盡鐵柱觀亦僅  
存一殿耳未幾指揮康泰反如其言尋又言國中大臣  
有變宜豫防至秋平章邵榮參政趙繼祖伏甲北門為  
亂事覺伏誅陳友諒圍南昌三月太祖伐之召問之曰  
五十日當大勝亥子之日獲其渠帥帝命從行舟次孤  
山無風不能進乃以洞元法祭之風大作遂達鄱陽大  
戰湖中常遇春孤舟深入敵舟圍之數重衆憂之曰無

憂亥時當自出已而果然連戰大勝友諒中流矢死降其衆五萬自啟行至受降適五十日始南昌被圍帝問何日當解曰七月丙戌報至乃乙酉蓋術官算厯是月差一日實在丙戌也其占驗奇中多若此為人狷介寡合與之言稍涉倫理輒亂以他語類佯狂玩世者嘗好戴鐵冠人稱為鐵冠子云

張三丰遼東懿州人名全一一名君實三丰其號也以其不飾邊幅又號張邈邈頎而偉龜形鶴背大耳圓目



鬚髯如戟寒暑惟一衲一蓑所啖升斗輒盡或數日一食或數月不食書經目不忘游處無恒或云能一日千里善嬉諧旁若無人嘗游武當諸巖壑語人曰此山異日必大興時五龍南巖紫霄俱燬於兵三丰語其徒去荆榛辟瓦礫創草廬居之已而舍去太祖故聞其名洪武二十四年遣使覓之不得後居寶雞之金臺觀一日自言當死留頌而逝縣人共棺殮之及葬聞棺內有聲啟視則復活乃遊四川見蜀獻王復入武當歷襄漢踪

跡益竒幻永樂中成祖遣給事中胡濙偕內侍朱祥齋  
璽書香幣往訪遍歷荒徼積數年不遇乃命工部侍郎  
郭瑾隆平侯張信等督丁夫三十餘萬入大營武當宮  
觀費以百萬計既成賜名太和太岳山設官鑄印以守  
竟符三丰言或言三丰金時人元初與劉秉忠同師後  
學道於鹿邑之太清宮然皆不可考天順三年英宗賜  
誥贈為通微顯化真人終莫測其存亡也

袁珙字廷玉鄞人高祖鏞宋季舉進士元兵至不屈舉

家十七人皆死父士元翰林檢閱官珙生有異稟好學能詩嘗遊海外洛伽山遇異僧別古崖授以相人術先仰視皎日目盡眩布赤黑豆暗室中辨之又懸五色縷窓外映月別其色皆無訛然後相人其法以夜中燃兩炬視人形狀氣色而參以所生年月百無一謬珙在元時已有名所相士大夫數十百其於死生禍福遲速大小并刻時日無不奇中南臺大夫布哈特穆爾由閩海道見珙珙曰公神氣嚴速舉動風生大貴驗也但印堂

司空有赤氣到官一百十四日當奪印然守正秉忠名  
垂後世願自勉普署臺事於越果為張士誠逼取印綬  
抗節死見江西憲副程徐曰君帝座上黃紫再見千日  
內有二美除但冷笑無情非忠節相也徐於一年後拜  
兵部侍郎擢尚書又二年降於明為吏部侍郎嘗相陶  
凱曰君五岳朝揖而氣色未開五星分明而光澤未見  
宜藏器待時不十年以文進為異代臣官二品其在荆  
揚間乎凱後為禮部尚書湖廣行省參政其精類如此

洪武中遇姚廣孝於嵩山寺謂之曰公劉秉忠之儔也  
幸自愛後廣孝薦於燕王召至北平王雜衛士類已者  
九人操弓矢飲肆中珙一見即前跪曰殿下何輕身至  
此九人者笑其謬珙言益切王乃起去召珙宮中諦視  
曰龍行虎步日角插天太平天子也年四十鬚過臍即  
登大寶矣已見藩邸諸校卒皆許以公侯將帥王慮語  
洩遣之還及即位召拜太常寺丞賜冠服鞍馬文綺寶  
鈔及居第帝將建東宮而意有所屬故久不決珙相仁

宗曰天子也相宣宗曰萬歲天子儲位乃定珙相人即知其心術善惡人不畏義而畏禍患往往因其不善導之於善從而改行者甚多為人孝友端厚待族黨有恩所居鄆城西遠舍種柳自號柳莊居士有柳莊集永樂八年卒年七十有六賜祭葬贈太常少卿子忠徹字靜思幼傳父術從父謁燕王王宴北平諸文武使忠徹相之謂都督宋忠面方耳大身短氣浮布政使張曷面方五小行步如蛇都指揮謝貴擁腫蚤肥而氣短都督耿

獻顧骨插鬢色如飛火僉都御史景清身短聲雄於法  
皆當刑死王大喜起兵意益決及為帝即名授鴻臚寺  
序班賜賚甚厚遷尚寶寺丞已改中書舍人扈駕北巡  
駕旋仁宗監國為讒言所中帝怒榜午門凡東宮所處  
分事悉不行太子憂懼成疾帝命蹇義金忠偕忠徹視  
之還奏東宮面色青藍驚憂象也收午門榜可愈帝從  
之太子疾果已帝嘗屏左右密問武臣朱福朱能張輔  
李遠柳升陳懋薛祿文臣姚廣孝夏元吉蹇義及金忠

呂震方賓吳中李慶等禍福後皆驗九載秩滿復為尚  
寶司丞進少卿禮部郎周訥自福建還言閩人祀南唐  
徐知諤知誨其神最靈帝命往迎其像及廟祝以來遂  
建靈濟宮於都城祀之帝每遘疾輒遣使問神廟祝詭  
為仙方以進藥性多熱服之輒痰壅氣逆多暴怒至失  
音中外不敢諫忠徹一日入侍進諫曰此痰火虛逆之  
症實靈濟宮符藥所致帝怒曰仙藥不服服凡藥耶忠  
徹叩首哭內侍二人亦哭帝益怒命曳二內侍杖之且



曰忠徹哭我我遂死耶忠徹惶懼趨伏偕下良久始解  
帝識忠徹於藩邸故待之異於外臣忠徹亦以帝遇已  
厚敢進讜言嘗進外國取寶之非武臣宜許行服衍聖  
公誥宜改賜玉軸聞者臆之宣德初覲帝容色曰七日  
內宗室當有謀叛者漢王果反嘗坐事下吏罰贖正統  
中復坐事下吏休致二十餘年卒年八十有三忠徹相  
術不殊其父世所傳軼事甚多不具載其相王文謂面  
無人色法曰瀝血頭相于謙謂日常上視法曰望刀眼

後果如其言然性陰險不如其父與羣臣有隙即緣相  
法於上前齟齬之頗好讀書所著有人相大成及鳳池  
吟藁符臺外集載元順帝為瀛國公子云

戴思恭字原禮浦江人以字行受學於義烏朱震亨震  
亨師金華許謙得朱子之傳又學醫於宋內侍錢塘羅  
知悌知悌得之荆山浮屠浮屠則河間劉守真門人也  
震亨醫學大行時稱為丹溪先生愛思恭才敏盡以醫  
術授之洪武中徵為御醫所療治立效太祖愛重之燕

王患瘕太祖遣思恭往治見他醫所用藥良是念何以不效乃問王何嗜曰嗜生芹思恭曰得之矣投一劑夜暴下皆細蝗也晉王疾思恭療之愈已復發即卒太祖怒逮治王府諸醫思恭從容進曰臣前奉命視王疾啟王曰今即愈但毒在膏肓恐復作不可療也今果然矣諸醫由是免死思恭時已老風雨輒免朝太祖不豫少間出御右順門逮諸醫侍疾無狀者獨慰思恭曰汝仁義人也毋恐已而太祖崩太孫嗣位罪諸醫獨擢思恭

太醫院使永樂初以年老乞歸三年夏復徵入免其拜  
特名乃進見其年冬復乞骸骨遣官護送賚金幣踰月  
而卒年八十有二遣行人致祭所著有證治要訣證治  
類元類證用藥諸書皆櫟括丹溪之旨又訂正丹溪金  
匱鉤元三卷附以己意人謂無愧其師云

盛寅字啟東吳江人受業於郡人王賓初賓與金華戴  
原禮游冀得其醫術原禮笑曰吾固無所吝君獨不能  
少屈乎賓謝曰吾老矣不能復居弟子列他日伺原禮

出竊發其書以去遂得其傳將死無子以授寅寅既得  
原禮之學復討究內經以下諸方書醫大有名永樂初  
為醫學正科坐累輸作天壽山列侯監工者見而竒之  
令主書算先是有中使督花鳥於江南主寅舍病脹寅  
愈之適遇諸途驚曰盛先生固無恙耶予所事太監正  
苦脹盍與我視之既視投以藥立愈會成祖較射西苑  
太監往侍成祖遙望見愕然曰謂汝死矣安得生太監  
具以告因盛稱寅即召入便殿令診脈寅奏上脈有風

濕病帝大然之進藥果效遂授御醫一日雪霽召見帝  
語白溝河戰勝狀氣色甚厲寅曰是殆有天命耳帝不  
懌起而視雪寅復吟唐人詩長安有貧者宜瑞不宜多  
句聞者咋舌他日與同官對奕御藥房帝猝至兩人歛  
枰伏地謝死罪帝命終之且坐以觀寅三勝帝喜命賦  
詩立就帝益喜賜象牙棋枰并詞一闕帝晚年猶欲出  
塞寅以帝春秋高勸毋行不納果有榆木川之變仁宗  
在東宮時妃張氏經期不至者十月衆醫以姪身賀寅

獨謂不然出言病狀妃遙聞之曰醫言甚當有此人何不令早視我及疏方乃破血劑東宮怒不用數日病益甚命寅再視疏方如前妃令進藥而東宮慮墮胎械寅以待已而血大下病旋愈當寅之被繫也闔門惶怖曰是殆磔死既三日紅仗前導還邸舍賞賜甚厚寅與袁忠徹素為東宮所惡既愈妃疾而怒猶未解懼甚忠徹曉相術知仁宗壽不永密告寅寅猶畏禍及仁宗嗣位求出為南京太醫院宣宗立召還正統六年卒兩京太

醫院皆祀寅寅帝宏亦精藥論子孫傳其業初寅晨直  
御醫房忽昏眩欲死募人療寅莫能應一草澤醫人應  
之一服而愈帝問狀其人曰寅空心入藥房猝中藥毒  
能和解諸藥者甘草也帝問寅果空腹入乃厚賜草澤  
醫人

皇甫仲和睢州人精天文推步學永樂中成祖北伐仲  
和與袁忠徹扈從師至漠北不見寇將引還命仲和占  
之言今日未申間寇當從東南來王師始却終必勝忠



徹對如之比日中不至復問二人對如初帝命械二人  
不驗將誅死頃之中宮奔告曰寇大至矣初時得安南  
神礮寇一騎直前即以礮擊之一騎復前再擊之寇不  
動帝登高望之曰東南不少却乎亟麾大將譚廣等進  
擊諸將奮斫馬足寇少退俄疾風揚沙兩軍不相見寇  
始引去帝欲即夜班師二人曰明日寇必降請待之至  
期果降帝始神其術授仲和欽天監正英宗將北征仲  
和時已老學士曹鼎問曰駕可止乎胡王兩尚書已率

百官諫矣曰不能也紫微垣諸星已動矣曰然則奈何  
曰盍先治內曰命親王監國矣曰不如立儲君曰皇子  
幼未易立也曰恐終不免立及車駕北狩景帝遂即位  
寇之薄都城也城中人皆哭仲和曰勿憂雲向南大將  
氣至寇退矣明日楊洪等入援寇果退一日出朝有衛  
士請占仲和辭衛士怒仲和笑曰汝室中妻妾正相鬪  
可速返返則方鬪不解或問何由知曰彼問時適見兩  
鵲鬪屋上是以知之其占事率類此

全寅字景明安邑人年十二歲而瞽乃從師學京房術  
占禍福多奇中父清游大同攜之行塞上石亭為參將  
頗信之每事咨焉英宗北狩遣使問還期筮得乾之初  
曰大吉四為初之應初潛四躍明年歲在午其干庚午  
躍候也庚更新也龍歲一躍秋潛秋躍明年仲秋駕必  
復但繇勿用應在淵還而復必失位然象龍也數九也  
四近五躍近飛龍在丑丑曰赤奮若復在午午色赤午  
奮於丑若順也天順之也其於丁象大明也位於南方

火也寅其生午其壬其合也至歲丁丑月寅日午合  
於壬帝其復辟乎已而悉驗石亨入督京營挾自隨及  
額森逼都城城中人恟懼或請筮之寅曰彼驕我盛戰  
必勝寇果敗去明年額森請遣使迎上皇廷臣疑其詐  
寅言於亨曰彼順天仗義我中國反失奉迎禮寧不貽  
笑外蕃亨乃與于謙決計上皇果還景泰三年指揮盧  
忠告變事連南宮帝殺中官阮浪猶窮治不已外議洶  
洶忠一日屏人請筮寅叱之曰是兆大凶死不足贖忠

懼而佯狂事得不竟已而忠果伏誅英宗復辟將官寅寅固辭命賜金錢金卮諸物其父官指揮僉事將赴徐州英宗慮寅偕行乃授錦衣百戶留京師寅見石亨勢盛每因筮戒之亨不能用卒及於禍寅以筮游公卿貴人間莫不信重之然無一語及私年幾九十乃卒

吳傑武進人弘治中以善醫徵至京師試禮部高等故事高等入御藥房次入太醫院下者遣還傑言於尚書曰諸醫被徵待次都下十餘載一旦遣還誠流落可憫

傑願辭御藥房與諸人同入院尚書義而許之正德中武宗得疾傑一藥而愈即擢御醫一日帝射獵還億甚感血疾服傑藥愈進一官自是每愈帝一疾輒進一官積至太醫院使前後賜彪虎衣繡春刀及銀幣甚厚帝每行幸必以傑扈行帝欲南巡傑諫曰聖躬未安不宜遠涉帝怒叱左右掖出及駕還漁於清江浦溺而得疾至臨清急遣使召傑比至疾已深遂扈歸通州時江彬握兵居左右慮帝晏駕已得禍力請幸宣府傑憂之語

近侍曰疾亟矣可速還大內倘至宣府有不諱吾輩寧有死所乎近侍懼百方勸帝始還京師閱數月帝崩彬伏誅中外晏然傑有力焉未幾致仕子希周進士戶科給事中希魯舉人又有許紳者京師人嘉靖初供事御藥房受知於世宗累遷太醫院使歷加工部尚書領院事二十年宮婢楊金英等謀逆以帛縊帝氣已絕紳急調峻藥下之辰時下藥未時忽作聲去紫血數升遂能言又數劑而愈帝德紳加太子太保禮部尚書賜賚甚

厚未幾紳得疾曰吾不起矣曩者宮變吾自分不效必  
殺身因此驚悸非藥石所能療也已而果卒賜諡恭僖  
官其一子卹典有加明世醫者官最顯止紳一人其士  
大夫以醫名者又王綸王肯堂綸字汝言慈谿人舉進  
士正德中以右副都御史巡撫湖廣精於醫所在治疾  
無不立效有本草集要名醫雜著行於世肯堂所著證  
治準繩為醫家所宗行履詳父樵傳

凌雲字漢章歸安人為諸生棄去北遊泰山古廟前遇



病人氣垂絕雲嗟歎久之。一道人忽曰：汝欲生之乎？曰：然。道人鍼其左股立蘇。曰：此人毒氣內侵，非死也。毒散自生耳。因授雲鍼術治疾，無不效。里人病嗽絕食五日，衆投以補劑，益甚。雲曰：此寒濕積也。穴在頂鍼之必暈。絕逾時始蘇。命四人分牽其髮，使勿傾側。乃鍼果暈絕。家人皆哭。雲言笑自如。頃之氣漸蘇，復加補，始出鍼。嘔積痰斗許，病即除。有男子病後舌吐雲外，亦知醫。謂雲曰：此病後近女色太蚤也。舌者心之苗，腎水竭不能制。

心火病在陰虛其穴在左股太陽是當以陽攻陰雲曰  
然如其穴針之舌吐如故雲曰此知瀉而不知補也補  
數劑舌漸復故淮陽王病風三載請於朝召四方名醫  
治不效雲投以鍼不三日行步如故金華富家婦少寡  
得狂疾至裸形野立雲視曰是謂喪心吾鍼其心心正  
必知恥蔽之帳中慰以好言釋其愧可不發乃令二人  
堅持用涼水噴面鍼之果愈吳江婦臨產胎不下者三  
日呼號求死雲鍼刺其心鍼出兒應手下主人喜問故

曰此抱心生也手鍼痛則舒取臍掌視之有鍼痕孝宗  
聞雲名召至京師太醫官出銅人蔽以衣而試之所刺  
無不中乃授御醫年七十七卒於家子孫傳其術海內  
稱鍼法者曰歸安凌氏有李王者官六安衛千戶善鍼  
灸或病頭痛不可忍雖震雷不聞王診之曰此蟲啖腦  
也合殺蟲諸藥為末吹鼻中蟲悉從眼耳口鼻出即愈  
有跛人扶雙杖至王鍼之立去其杖兩京號神鍼李王  
兼善方劑或病痿玉察諸醫之方與治法合而不效疑

之忽悟曰藥有新陳則效有遲速此病在表而深非小劑能愈乃熬藥二鍋傾缸內稍冷令病者坐其中以藥澆之踰時汗大出立愈

李時珍字東璧蘄州人好讀醫書醫家本草自神農所傳止三百六十五種梁陶弘景所增亦如之唐蘇恭增一百一十四種宋劉翰又增一百二十種至掌禹錫唐慎微輩先後增補合一千五百五十八種時種大備然品類既煩名稱多雜或一物而析爲二三或二物而混

爲一品時珍病之乃窮搜博採芟煩補闕歷三十年閱書八百餘家彙三易而成書曰本草綱目增藥三百七十四種釐爲一十六部合成五十二卷首標正名爲綱餘各附釋爲目次以集解詳其出產形色又次以氣味主治附方書成將上之朝時珍遽卒未幾神宗詔修國史購四方書籍其子建元以父遺表及是書來獻天子嘉之命刊行天下自是士大夫家有其書時珍官楚王府奉祠正子建中四川蓬溪知縣又吳縣張頤祁門汪

機杞縣李可大常熟繆希雍皆精通醫術治病多奇中而希雍常謂本草出於神農朱氏譬之五經其後又復增補別錄譬之註疏惜硃墨錯互乃沈研剖析以本經為經別錄為緯著本草單方一書行於世

周述學字繼志浙江山陰人讀書好深思尤邃於歷學撰中經用中國之算測西域之占又推究五緯細行為星道五圖於是七曜皆有道可求與武進唐順之論歷取歷代史志之議正其訛舛刪其繁蕪又撰大統萬年

二厯通議以補厯代之所未及自厯以外國書皇極律  
呂山經水志分野輿地算法太乙壬遁演禽風角鳥占  
兵符陣法卦影祿命建除葬術五運六氣海道鍼經莫  
不各有成書凡一千餘卷統名曰神道大編嘉靖中錦  
衣陸炳訪士於經歷沈鍊鍊舉述學炳禮聘至京服其  
英偉薦之兵部尚書趙錦錦就訪邊事述學曰今歲主  
有邊兵應在乾良艮為遼東乾則宣大二鎮京師可無  
虞也已而果然錦將薦諸朝會仇鸞聞其名欲致之述

學識其必敗乃還里總督胡宗憲征倭招至募中亦不能薦以布衣終

張正常字仲紀漢張道陵四十二世孫也世居貴溪龍虎山元時賜號天師太祖克南昌正常遣使上謁已而兩入朝洪武元年入賀即位太祖曰天有師乎乃改授正一嗣教真人賜銀印秩視二品設寮佐曰贊教曰掌書定為制長子宇初嗣建文時坐不法奪印誥成祖即位復之宇初嘗受道法於長春真人劉淵然後與淵然



不協相詆訐永樂八年卒弟宇清嗣宣德初淵然進號  
大真人宇清入朝懇禮部尚書胡濙為之請亦加號崇  
謙守靜再傳至曾孫元吉年幼敕其祖母護持而贈其  
父留綱為真人封母高氏為元君景泰五年入朝乞給  
道童四百二十人度牒濙復為請許之尋欲得大真人  
號濙為請又許之天順七年再乞給道童三百五十人  
度牒禮部尚書姚夔持不可詔許度百五十人憲宗立  
元吉復乞加母封改太元君為太夫人以吏部言不許

乃止初元吉已賜號沖虛守素昭祖崇法安恬樂靜元同大真人母慈惠靜淑太元君至是加元吉號體元悟法淵默靜虛闡道弘法妙應大真人母慈和端惠貞淑太真君然元吉素充頑至僭用乘輿器服擅易制書奪良家子女逼取人財物家置獄前後殺四十餘人有一家三人者事聞憲宗怒械元吉至京會百官廷訊論死於是刑部尚書陸瑜等請停襲去真人號不許命仍舊制擇其族人授之有妄稱天師印行符籙者罪不貸時

成化五年四月也元吉坐繫二年竟以黃緣免死杖百發肅州軍尋釋為庶人族人元慶嗣弘治中卒子彥瑯嗣嘉靖二年進號大真人彥瑯知天子好神仙遣其徒十餘人乘傳詣雲南四川採取遺經古器進上方且以蟒衣玉帶遺鎮守中官為雲南巡撫歐陽重所劾不問十六年禱雪內庭有驗賜金冠玉帶蟒衣銀幣易金印敕稱卿不名彥瑯入朝所經郵傳供應或後期常山知縣吳襄等至下按臣治傳子永緒嘉靖末卒無子吏部

主事郭諫臣乘穆宗初政上章請奪其世封下江西守  
臣議巡撫任士憑等力言宜革乃去真人號改授上清  
觀提點秩五品給銅印以其宗人國祥為之萬厯五年  
馮保用事復國祥故封仍予金印國祥傳至應京崇禎  
十四年帝以天下多故召應京有所祈禱既至命賜宴  
禮臣言天順中制真人不與宴但賜筵席今應京奉有  
優旨請倣宴法王佛子例宴於靈濟宮以內官主席從  
之明年三月應京請加三官神封號中外一體尊奉禮

官力駁其謬事得寢張氏自正常以來無他神異專恃符籙祈雨驅鬼間有小驗顧代相傳襲閱世既久卒莫廢去云劉淵然者贛縣人幼為祥符宮道士頗能呼召風雷洪武二十六年太祖聞其名召至賜號高道館朝天宮永樂中從至北京仁宗立賜號長春真人給二品印誥與正一真人等宣德初進大真人七年乞歸朝天宮御製山水圖歌賜之卒年八十二閏七日入殮端坐如生淵然有道術為人清靜自守故為累朝所禮其徒

有邵以正者雲南人早得法於淵然淵然請老薦之名  
為道錄司左元義正統中遷左正一領京師道教事景  
泰時賜號悟元養素凝神沖默闡微振法通妙真人天  
順三年將行慶成宴故事真人列二品班末至是帝曰  
殿上宴文武官真人安得與其送筵席與之遂為制又  
有沈道寧者亦有道術仁宗初命為混元純一沖虛湛  
寂清靜無為承宣布澤助國佐民廣大至道高士階正  
三品賜以法服時有浮屠智光者亦賜號圓融妙慧淨

覺弘濟輔國光範衍教灌頂廣善大國師賜以金印智  
光武定人洪武時奉命兩使烏斯藏諸國永樂時又使  
烏斯藏迎尚師哈里瑪遂通番國諸經多所譯解歷事  
六朝寵錫冠羣僧與淵然輩淡泊自甘不失戒行迨成  
化正德嘉靖朝邪妄雜進恩寵濫加所由與先朝異矣

明史卷二百九十九

欽定四庫全書

明史卷二百九十九考證

滑壽傳王居中名醫也壽從之學

臣章宗瀛按紹興

府志葉逢春云壽蓋劉文成基之兄易姓名為醫文成既貴嘗勸之仕不應而去謹附識

晚自號櫻寧生

臣

章宗瀛按朱右撰傳云壽在揚州

曰滑壽在蘇州曰伯仁在餘姚曰櫻寧生見府志謹

附考



葛乾孫傳父應雷以醫名

臣

章宗瀛按蘇州府志應

雷所著有醫學會同二十卷由平江醫學教授擢江

南醫學提舉元末人也謹附考

張中傳參政趙繼祖

舊本繼誤維

臣

章宗瀛按本紀

作趙繼祖此書趙維祖應係刊刻之訛謹據改

袁珙字廷玉鄞人

臣

章宗瀛按獻徵錄珙字廷玉以

字行其先南昌人後家於鄞謹附考

逮諸醫侍疾無狀者

舊本逮作治

臣

章宗瀛按明紀

事本末是時召諸醫侍疾無狀者悉付獄是尚未治罪也此傳治字文義未協謹據改

盛寅傳太監具以告因盛稱寅即召入便殿

臣章宗

瀛按獻徵錄永樂乙酉郡大夫薦授醫學正科名日振庚子至京師求療者戶不能容太宗聞知召對與此稍異謹附考

全寅傳英宗復辟將官寅

臣

章宗瀛按是時景帝弗

豫中外以儲嗣未定為憂寅亟言於石亨早定大計

亨意遂決英宗復辟欲官寅以此見明紀事本末謹

附考

吳傑武進人

臣

章宗瀛按傑字士奇見獻徵錄謹附

考

可速還大內閱數月帝崩舊本可速作僅可閱數月

作甫還而臣章宗瀛按本紀武宗於十五年九月得

疾十二月還京師至次年三月崩於豹房此云僅可

還大內甫還而帝崩似失實謹據改

累遷太醫院使歷加工部尚書領院事

臣章宗瀛按

識大錄云連加通政使禮部侍郎工部尚書領院事

傳不詳載謹附識

凌雲字漢章

臣章宗瀛按兩浙名賢錄以漢章為名

不為字謹附考

周述學字繼志浙江山陰人讀書好深思 舊本無浙

江字深下有湛之二字

臣章宗瀛按地理志山陰有

二一浙江一山西考通志宜為浙江山陰謹據增并

於下句節去兩字以敷勻刻

張正常傳

臣

章宗瀛按正常於洪武十年秋偕李善

長祀嵩山還家卒見縣志此傳未悉謹識

劉淵然傳賜號長春真人

臣

章宗瀛按獻徵錄是時

淵然賜號冲虛至道元妙無為光範衍數莊靜普濟  
長春真人傳內前後諸人俱詳載賜號獨淵然未悉

謹附識

有浮屠智光者亦賜號圓融妙慧淨覺弘濟輔國光範

衍教灌頂廣善大國師賜以金印

臣

章宗瀛按識

大錄載英宗即位復加號西天佛子錫以玉印謹附

識

明史卷二百九十九考證